



Pareri dal president

Preziadas commembras, stimai commembers

Era miu secund onn presidial ei staus fetg intensivs, denton buca meins interessants ed ei ha dau ina ni l'otra sfida, che ha vuliu vegnir dumignada. Cun vies sustegn ed engaschi ei quei perencunter tut stau da supportar cun in lev surrir.

Scrifer in pareri ei nuota schi sempel sco ei vesa ora. El duess buca esser memia cuorts, memia liungs denton era buc, empau serius duess el era tunar, denteren denton ina pintga sgnocca sans far, cun tons magisters el'uniun ei la grammatca naturalmein era da risguardar e la finfinala astg' ins, da ludar ni engraziar era negin emblidar. Detg serius vaiel mirau sin nuot da quei e semplamein scret miu pareri libers da tut las reglas e pretensiuns e sperel semplamein che silmeins dus ni treis da vus legien miu padua tochen la fin.

Nus vegnin tuts buca pli giuvenis pli, ed in pign mal cheu ni leu mudregia nus, pli vegls che nus vegnin, pli u meins mintga di, tgi savess buca raquintar enzatgei giudlunder! Denton, ins emprovan da far da ferm e da nuota schar sentir nies contuorn enzatgei, naturalmein priu ora ils carstgauns che statan a nus il pli datier. In bien exempel persuerter ein nies dirigent d'honor, igl Eugen Casanova. Da morder sils dents ha el tgunsch empriu gia da buob enta Vrin, entadem la bellezza Val Lumnezia, leu nua ch'el ei carschius si. Il davos temps ha el tuttina buca saviu zuppentar ch'enzatgei mudregia el. Anzi, al'emprema prova da cant dil 2020 ha mintgin ch'ei buca diltut tschocs viu, che nies Eugen pitescha, ch'el ha propi mal e la finfinala ha el stuiu veser en sez, ch'ei va pil mument buca pli, ch'el drova ina pausa per seregenerar, ch'el sto, bugen ni nuidis, surdar la bitgetta dil Chor maschadà Rumantsch Rezia Bassa (tgei liung num) en auters mauns e serertrer en la secunda retscha.

Jeu sundel denton perschuidius, ch'Eugen vegn a haver vinavon grond plascher da "siu" chor, sche buca pli sco dirigent, mobein sco vicedirigent e bassist da renum, e sperel che nus astgeien profitar aunc biars, biars onns da sia enorma experienza musicala.

Igl Eugen ei staus dirigent naven dalla fundaziun dil chor, quei notabene igl onn 1986, tochen oz, tgei che plaيدا per sesez e pretenda ina honoraziun adequata, la tala nus vegnin a far a caschun da nossa radunonza generala dils 14 da mars 2020 a Vilters.

Retrospectiva 2019

Radunonza generala

Suenter total 27 radunonzas generalas sut il tgamun da nies zun preziau president d'honor Venanzi Casanova, ha ei giu num da sendisar vid ina nova fatscha leu davontier, vid ina nova moda da presentaziun e vid ina ni l'otra caussa, forsa buca gest aschi usitada sco tochen da cheu. Lein sperar ch'il

schoc cultural seigi buca staus memia vehements per ils presents e che vus vegnies tuttina puspei alla proxima radunonza generala.

Per mei eis ei en mintga cass stau ina enorma sfida da surpender la successiun da Venanzi e jeu vaiel fatg quei cun immens respect, ha el gie presidiau l'uniun cun grond engaschi e success.


Tonaton, sin la radunonza sco tala lessel buca entrar pli detagliu en quest pareri, las informaziuns necessarias saveis bugen leger suenter el protocol aschuntaus al'invitaziun.

Occurenzas

Nus savein tuts, las pretensiuns ed ils gusts divergeschan ualti fetg da commember tier commember, aschia ch'igl ei tut auter che sempel da tschentiar ensemmen sentupadas ed occurenzas adequatas e che animeschan e san incantar mintgamei la roscha necessaria, da prender part. Era duein ils cuosts aunc esser surportabels per in e scadin e vinavon la cassa dal'uniun buca gest vegnida sminuida talmein, che nies pauper cassier survegn cavels grischs, ni va tochen il davos aunc entuorn cun ina blutta (manegiau ei lu per cass ina "Glatze" e buca schglioc enzatgei).

Maletgs resdan magari dapli che massa plaids, perquei vegnel jeu a far in sguard anavos sin las sentupadas vargadas, sco usitau, alla radunonza generala e desistel perquei da dar ussa cheu miu pareri giudlunder. Vegni alla radunonza generala e vus vegnis a veser, las fatschas rientas ed ils numerus participonts ein mussament avunda che la suprastonza ha puspei tuciau il gust d'enqualin ed animeschan dad ir vinavon sin quella senda. Entginas bialas fotografias dallas sentupadas passadas ein era d'anflar sin nossa pagina d'internet www.reziabassa.ch.

Chor maschadà Rumantsch Rezia Bassa



Actual dumbra il chor, priu en dirigenta e dirigents, 41 cantadurs e cantaduras.

Suenter ch'ils organisaturs dils concerts el Dorfbad a Ragaz Bogn han tut sur ura giu il sentiment, ch'ei fetgi basegns da

far enqual midada e han, suenter biars onns, buca envidau en pli nies chor per dar in concert, ha ei giu num d'encurrir in' alternativa, la quala nus havein enflau cun organisar in concert el Kursaal a Ragaz Bogn, quei ensemmen cun la Rita Bundi ed ils "Schwyzerörgelifründa MSLU". L'organisaziun da quei concert havein nus fatg in tec alla huscha e cheutras forsa sorprendiu in ni l'auter cantadur e cantadura, quei denton senza malvulientscha. Il success ha denton, perclieg, dau raschun a nus ed aschia astgein mirar anavos sin ina occureza bein gartegiada, schegie ch'in tun ni l'auter havess forsa astgau esser empauet pli exacts, denton vid gliez gliemein nus vinavon en mintga prova, tochen ch'il resultat ei adequats a nossas pretensiuns.

Il potenzial ed era il diember da cantadurs e cantaduras, da dirigents e dirigente ein en mintga cass avon maun ed era igl anim e slonsch da tuts maunca buc, perquei savein mirar cun gronda perschuaision el futur.

Prevista 2020

Occurenzas

La gliesta dallas occurenzas e sentupadas previdas el 2020 haveis vos gia retschert all'entschatta digl onn per posta. Vinavon anfleis era sin nossa pagina d'internet las indicaziuns correspondentas.

L'emprema sentupada egl onn niev ei gia historia ed ei stada in bi success. Belezzi'aura, ina cuntrada magnifica ed in stupent gentar en buna e legra cumpagnia ha spetgau ils partizipants si Schönalden e schau sglar il temps sco nuot sperasvi. La tura da gianellas ei stada per ils biars da nus ina premiara e ha fatg gust sin dapli, schi bi eis ei stau. Denton era tals che han fatg ina spassegiada a pei e han gudiu il bien vin sin la terassa ein buca vegni memia cuort, han giu lur gaudi.

Las marveglias tgei che marscha aschia davos las culissas da radio e televisiun rumantscha si Cuera paran dad esser avon maun, ein tuttina ina gronda roschada rumantschs senunziai per quei event la fin fevrer.

Vinavon anflan ins sentupadas enconuschentas e secumprovas sin la gliesta d'occurenzas, sco per exempel la sentupada rumantscha cun lotto, il cuors da cuschanar ed aschia vinavon. Denton dueien era caussas novas haver plaz el calender annual da nossa uniun. Lein sperar che era talas anflan vossa reconuschienscha.

Chor maschadà Rumantsch Rezia Bassa


Il concert ch'il chor dat ils 3 d'avrel ad Aschera (Schiers) ensemmen cun il chor viril indigen duei buca mo esser ina caschun per cantadurs e cantaduras da mussar lur inschign, mobein era per far enconuschenta noss'uniun ella regiun dalla Purtenza Sut ed aschia forsa recrutar in ni l'auter per l'uniun Rumantscha Rezia Bassa. Vinavon vegn il chor era a cantar ils 8 da november en baselgia a Maiavella, quei duront in survetsch divin.

En mia introducziun vaiel fatg attents sin la situaziun actuala d'Eugen Casanova. Per buna ventira havein nus anflau cun la Monika Arpagaus ina alternativa fetg valabla e savein aschia

mirar per il mument ruaseivlamein el futur. Era Amadeus Muoth stat vinavon a disposiziun sco vice-dirigent, aschia che nus havein, cun ina dirigenta e dus vices, ina situaziun fetg confortabla.

Commembers

Che l'uniun Rumantscha Rezia Bassa dumbra in tschep surpli da commembers e commembras fetg fideivels e fideivlas ei zun legreviel e segirescha igl exister da tala, segir per ils onns proxims. In sguard sin il suadont diagram duei denton far attents nus, che l'acquisaziun da commembers novs sto esser, duei l'uniun era aunc exister en 10-20 onns, ina sfida che vala da prender seriusa e che nus astgein buca munchentar.



Rumantschas e rumantschs dat ei detgavunda egl intschesch dal'Uniun Rumantscha Rezia Bassa. Ei vala denton d'incantar nos amitgs rumantschs, nossas amitgas rumantschas per l'uniun, da far attents sin ella e da perschuaider els ch'esser commember da noss'uniun ei ina plivaleta per mintga rumantsch e rumantscha en la diaspora.

Suprastonza

Cu ins enquera candidats novs che sorprendan ina scharscha en in'uniun ha ei pil pli num: quei ei nuota schi nausch, schi bia temps stos nuota metter a disposiziun, quei pos far senz' auter.

Aschia vegn ei era ad esser stau tier mes dus consuprastonts. Denton oha, ei han fatg il quen senza il president, cura ch'els han dau tier da sengaschar per l'uniun! Quei cumpogn stuorn e tgau dir dalla Lumnezia sa numnadamein far la tgiagia cun tarmetter trasora brevs electronicas, pretender resumaziuns d'il quen, tabellas cheu e leu e quei subito, per favore, cun curregier mintga pup en ils protocolls dallas sesidas ed aschia vinavon, sco sche actuara e cassier havessen nuot auter da far. Aschia ston ins quintar che la harmonia en suprastonza piteschi forsa ina ni l'otra gada, tgei ch'ei denton vegniu avon fetg, fetg pauc e ha tochen da cheu buca giu consequenzas nunvulidas. Per adattar las lavurs, adequat al temps liber che stat a disposiziun a mintgin, sesprova il president tonaton da parter si las incumbensas leusunter e schanegiar schi bia sco pusseivel ses consuprastonts e morder en sez empau dapli leu nua ch'ei fa basegns, aschia ch'il prighel che enzatgi mondi tuttenina cun la brocca duei buca esser daus.

Visiuns, siemis e desillusius

Mintga president astga e duess haver certas visiuns e siemis all' entschatta da sia carriera, sto perencunter era esser cunscients che las desillusius ein era buca lunsch naven e magari pli presentas che spitgau e che tut va magari nuota schi prest sco giavischau. Cheu ha ei num haver pazienza e far pass per pass tochen ch'ins arriva, forsa, leu nua ch'ins vul.

Igl artechel 01 dallas statutas pretenda il suandont: L'Uniun Rumantscha Rezia Bassa ha la finamira da mantener e cultivar il lungatg e la cultura rumantscha, specialmein il cant rumantsch tradiziunal.

Al cant rumantsch dein nus, cun nies chor, en mintga cass la peisa giavischada e pusseivla al cant tradiziunal. Che quei schabegia sulet ina gada al meins ei sapientiv ed era in motiv che tons contan el chor rumantsch, dapli temps schai semplamein buca en, contan tuttina enqualin/a dasperas aunc en in auter chor.

Mantener e cultivar il lungatg e la cultura rumantscha – cheu dat ein numerusas pusseivladads da contonscher quella finamira. Sco dapertut giogan las finanzas che stattan persunter a disposiziun ad in'uniun, deplorablamein ina rolla essenziala e laien dissolver enquala visiun, enqual siemi en nuot. Vegn vitier che l'uniun tetgala dils rumantschs ha, sco ella lai adina puspei saver, tonaton la beinvulentscha da sustener la diaspora, cu ei va denton per metter entuorn las premissas vegn ella tuttina buca sin ina frastga verda. Nus lein auncallura buca dar si, ei ha gie num, la speranza miera il pli davos.

Suenter miu manegiar muossa l'Uniun Rumantscha Rezia Bassa ch'igl ei pusseivel da promover e sustener il lungatg rumantsch era cun mieds finansials plitost mediochers e che semplamein dar la caschun als rumantschs, allas rumantschas ella diaspora da sentupar ed aschia saver far diever dil lungatg mumma vala ton sco enqual project pli pompos.

En l'emissiun Cuntrasts da RTR da dumengia vargada cun il tema "Rumantschs en la diaspora, tgei san ins far per mantener il rumantsch" ha la dunna Campell serrau sia contribuziun suandontamein: "tgei ch'ei per mei clar, il sulet che gida ei da discuorrer, raschunar, tschintschar, plidar, risdar rumantsch" – con ver, denton quei ei nuot niev, quei san ils rumantschs e las rumantschas da noss'uniun gia dapi biars onns, quei han ils fundaturs da noss'uniun gia senti u e ferdau avon 54 onns!

En la contribuziun sura numnada vegn ei era pretendiu ch'il Chor Rumantsch da Zug seigi il sulet chor rumantsch ordeifer il Grischun – ina gagliardia encenter il Chor Rumantsch Rezia Bassa, ch'exista gia dapi 34 onns e prosperescha aunc adinna e quei pli che mai e leu nua ch'ei vegn discurreu era allas provas da cant rumantsch e buca tudestg! En quella causa vegnan ils responsabels da RTR aunc ad udir enzatgei da mei, rescherschas seriusas vesan ora empau auter.

Da l'autra vart muossa quei gest era, che l'Uniun Rumantscha Rezia Bassa ei aunc bia memia pauc enconuschenta e presenta el contuorn, cheu dat ei aunc in grond potenzial che nus stuein nezegiar meglier e pli intensiv, vulein nus plidentar era tals rumantschs e rumantschas ella regiun ch'ei in tochen da cheu aunc buca cunscients, vul dir che forsa gnanc

san ch'ei dat ina tala uniun. Cheu patratgel jeu specialmein era vid nos convischins sutsilvans, surmirans, puters e valladers ch' ein practicamein buca presents en noss'uniun, en quala ils sursilvans dumbran ina maioritad sorprendenta.

Per aunc vegnir inagada anavos sin la contribuziun da Cuntrasts che ha mussau, suenter miu meini, pli u meins mo semeglias che dattan plitost da patertgar enstagl da far speranza per il rumantsch (in sulet chor rumantsch ordeifer il Grischun, tgei ch'ei leutier gnanc ver buca, scuntradas rumantschas a Berna cun 5 participonts, secundas e tiarzas generaziuns da rumantschs che capeschau buca pli il lungatg da lur antenats eav.): ei dat era exempels che fan dapli curascha e resdan enzatgei auter e quei gnanc schi lunsch naven dalla capitala Grischuna, numnadamein egl intschesch dal'Uniun Rumantscha Rezia Bassa.

Plaid final (finalmein, po in ni l'auter tertgar)

A vus caras commemoras e prezias commembers lessel, sco finiziu da miu pareri, dir engraziel per vossa confidanza e per las bialas uras che nus havein astgau guder ensemmen igl onn passau.

In grond engraziel era a mintgin/a che ha mess a disposiziun ina part da siu scart temps liber per favur da noss'uniun, seigi quei cun segidar, organisar, controllar, quintar, cussegljar, sponsurar, cuschanar, barsar, schubergiar, serunar, sevilar, cantar, diregier, scriver ed aschia vinavon, seigi quei davon ni davos las cullissas, ni in summa dapertut leu, nua ch'ei ha fatg da basegns.

Vus tuts essas l'Uniun Rumantscha Rezia Bassa, grazia a vus prosperescha ella, grazia a vus han ils Rumantschs da nossa regiun la pusseivladad da sentupar, da passentar enqual biala e legra ura en cumpagnia rumantscha, grazia a vus percorscha nies contuorn tudestg, ch'il lungatg rumantsch ei aunc presents, ch'el viva aunc, grazia a vus va era igl unic cant rumantsch, van las bialas canzuns rumantschas buca en emblidanza.

Aschia fa ei era grond plascher da tgamunar in'uniun e lai emblidar las bialas uras ch' ein nezzessarias persunter.

Jeu sundel cunscients da haver strappazau vossa pazienza bravamein cun miu pareri liungs e lads sco ina barbalada da truffels ed admirel zun fetg tut quels che han legiu tal entochen la fin e buca spedi il pareri, gia suenter haver legiu l'emprema pagina, el canaster da pupi.

Jeu selegrel gia oz sin in bien seveser alla proxima sentupada e specialmein a nossa radunanza generala a Vilters e salidel vus tuts cordialmein, quei cun l'empermischun da far miu proxim pareri (forse) empau pli cuorts.

Mols, ils 20.02.2020, vies president

Rinaldo Caduff